



- Driin! Driin!

Al jere agns che il telefon tacât intal mûr da l'ostarie nol sunave.

- Driin! Driin!

Un cidinôr al jere plombât di colp inta stanzie. L'ostîr si stave svicinânt ben planc al tramai che al veve sunât, come che al fos une bombe pronte a scupiâ.

- Pronto! - Al veve dit, ma po dopo un moment, al veve za metût jù.

Ducj lu cjalavin.

Al tremave.

- Driin! Driin!

Dute la int da ostarie a si jere metude ator dal telefon. Il sun al veve cjàpât alc di nereôs.

Di daûr il Comissari Rocheton si jere fat strade, sburtant no pôc. Rivât in face a l'imprest, al veve tirât sù il ricevidôr.

- Pronto!

- O vevi voie di domandâ... - La vôs di chê altre bande a jere lontane, flape, spaurose.

- Pronto! Cui isal che al cjacare? Pronto!

Po dopo un moment, Il Comissari al veve metût jù il telefon e si jere zirât viers chei da ostarie.

- Al è sucedût un delit. Cualchidun al à clamât par vê il nestri jutori. A jere une femine, cence flât, la vôs flape, il respîr che planc al murive. Difati a devi jessi muarte.

La platee lu cjalave cui voi spalancâts.

- Cemût si podie savê cui che a jere? - al veve dit Spilot, saltant fûr da schirie di oms.

- No sai - al veve rispuindût Rocheton. - Ma o crôt che nol sedi plui nuie ce fâ. Sigûr cualchidun al devi vê cjàpât chê puare femine, pestade e salacor aprofitât di jê e dal so cuarp. Po dopo un colp di pistole, o pûr une curtissade inta schene. Par jê, al è restât juste il timp di rivâ al telefon e fâ un numar a câs, il numar da ostarie. Un fîl di vôs che al domande jutori, il fîl da vite che planc si romp dal dut. Muarte!

Ducj a cjalavin Rocheton. L'ostîr al veve tirât fûr un peçot e si suiave las lagrimes.

Intun trat, si è sintût un colp, e la puarte da ostarie si jere sledrosâde.

Impins su la puarte al jere jentrât cualchidun, dut tabarossât. Une sjarpe a taponave la muse fin sore i voi. Une scufe, une istriane.

Ducj si jerin voltâts a cjalâ.

- O cirivi Toni! - Une vôs flape di femine. - O ai clamât plui volte par telefon, ma cun cheste maladete di grocje al è dificil fasi capî.

- Amîs... - al veve dit Spilot, - Eco sberdeât il câs da la vôs di muart!

**di Massim Furlan**